

欽
定
全
唐
文

欽定全唐文卷九百三十三目錄

杜光庭 五

歷代崇道記

欽定全唐文卷九百三十三

杜光庭 五

歷代崇道記

穆王於崑崙山王屋山嵩山華山泰山衡山恒山終南山
會稽山青城山天台山羅浮山崆峒山致王母觀前後度
道士五千餘人秦始皇帝併吞六國招方士好長生之術
遣使往蓬萊採不死藥造宮觀一百餘所度道士一千七
百餘人漢文帝竇太后並好黃老之術造宮觀七十二所
勅天下如不通黃老經者不得注官又親訪河上公問道

德之要天下大治計度道士一千餘人孝武帝奉道彌篤
感王母降於宮中遺帝白銀像五軀曰是太上老君之真
形也帝別營三殿而供養之後移像於柏梁臺上後又移
於甘泉宮內以一殿而並列之南向設座自茲始也又度
公主數人及度道士約五千餘人並造觀三百餘所其嵩
嶽萬歲觀泰山登封觀華山集仙觀終南望靈觀王屋通
天觀並不得令庶姓居之以爲恒式其萬歲觀因帝巡幸
而聞山呼遂捨行宮而爲觀焉至孝宣帝時有上黨郡功
曹李暉因入抱犢山採藥於石室內獲天書四十餘卷并

玉箱玉杖獻於河東郡太守張純純立遣使上進帝視之大驚不覺流涕乃令宣示內外臣僚時冉癸爲主書中郎將見之泣曰此是武帝臨崩時遺制令葬於梓宮之內何由至此及披之卷後所有臣僚校勘姓名於今見有存者帝乃遣使檢校茂陵卽又安宛如故帝乃爲武帝造觀二所一在長安城內一在茂陵之下以奉先帝也復度道士二十人以奉香火也後赤眉之亂茂陵爲賊所發於梓宮之中但見有劍一口方欲取之其劍忽然哮吼騰空而去世祖光武皇帝旣平王莽天下大定東封禮畢乃爲本朝

十一帝追薦及南陽春陵名山大川長安洛陽計造觀一百二十所度道士一千八百人魏明帝爲武帝及先太后造觀於五都計一十三所度道士一百九人仍詔道書同御史裝飾吳主孫權於天台山造桐柏觀命葛元居之於富春造崇福觀以奉親也建業造興國觀茅山造景陽觀都造觀三十九所度道士八百人晉武帝於洛陽造通天洞天靈仙靈寶四觀及諸州共二百所先魏末隴右臨洮郡有神人長三丈著白衣垂素髮戴金冠現於襄武縣告縣人王始曰不久當見太平及武帝授禪果天下一統帝

乃令於所現處造告平觀卽李宗之故居也別度道士七人并前後所度道士共計四百七十二人時吳郡臨平湖岸崩獲石鼓一枚遣使上進帝問司空張華此物何用曰但以桐木刻作鯨魚形扣之必有聲聞於數里至惠帝時於宮中忽夜鳴不已帝甚惡之乃遷嵩山萬歲觀擊之集眾自茲始也後魏道武帝於雲中太原及河朔造觀計五十所度道士六百餘人太武勅令天下造太平觀共二百七十五所度道士一千三百人帝受籙改太平眞君元年仍令四方内外上書言太平眞君皇帝陛下自後嗣帝位

並皆受籙後周武帝於長安造通元館以延羽客隋高祖
文皇帝遷都於龍首原號大興城乃於都下畿內造觀三
十六所名曰元壇度道士二千人煬帝遷都洛陽復於城
內及畿甸造觀二十四所度道士一千一百人皇朝高祖
神堯大聖大光孝皇帝於隋末大業十三年感霍山神稱
奉太上老君命告唐公汝將來必得天下至武德元年晉
州浮山縣羊角山著素衣戴金冠乘朱驥白馬令吉善行
告神堯汝今得聖理可於長安城東致一安化宮而安道
像則社稷延長天下大定善行辭見天子何以為據太上

曰但去有獻石龜者可以爲信善行乃告晉州刺史賀君
孝義孝義遂將善行見秦王具告神人現事羣臣拜慶遂
差左親衛帥杜昂與善行於所現處設祭太上又現一如
善行所言以鞭指昂曰汝是何人昂曰是秦王使者太上
曰我不飲不食何用祭乎所有委曲令人具知昂還乃言
神人復現秦王大悅乃令昂將善行入京上奏至京立未
定果有印州治中張達獻石龜上有文曰天下安子孫興
千萬歲千萬葉遂入面奏高祖大悅詔授善行爲朝散大
夫賜物一百段乃令通事舍人柳憲於羊角山立廟復改

浮山縣爲神仙縣羊角山爲龍角山太上又現爲善行曰
天子喜歡否對曰大喜又曰疑惑何事復對曰爲不知聖
者姓名耳太上曰我是無上神仙姓李氏號老君卽我也
我卽帝之祖也史記中有傳亳州谷陽縣本廟有枯檜再
生爲驗我已令周公旦領神兵助國家打劉黑闥得四月
節卽破矣孝義又令善行入奏高祖乃勅善行馳驛往洛
陽軍所宣勅示諭至時果平黑闥四海大定枯檜亦重生
焉乃改廟爲慶唐觀內有明皇御製書碑及列聖眞容並
在武德三年詔晉陽道士王遠知授朝散大夫并賜銀金

冠子紫絲霞帔以預言高祖受命之徵也太宗又加遠知銀青光祿大夫並遠知預言之故也羽衣人賜紫衣自茲始也高宗龍朔二年詔洛州長史譙國公許力士於却山建上清宮以鎮鬼仙洞掘得古石案卽仙人帛仲理之故基也及功畢帝令設醮太上又現百官進表稱賀帝大悅乾封初帝東封禮畢迴鑾亳州親謁太上謹上尊號爲混元皇帝聖母爲先天太后仍改谷陽縣爲真源縣又爲太宗及文德皇后造東明觀於京師又勅道士宜隸宗正寺仍立位在親王之次文明元年天后欲王諸武太上乃現

於號州閭鄉縣龍臺鄉方興里皇天原遣鄔元崇令傳言
於天后云國家祚永而享太平不宜有所僭也天后遂寢
乃捨閭鄉行宮爲奉仙觀後慶山湧出於新豐縣界高三
百尺上有五色雲氣下有神池數頃中有白鶴鸞鳳四面
復有麒麟獅子天后令置慶山縣其諸祥瑞具載天后實
錄以表國家土德中興之兆也又捨中嶽奉天宮爲嵩陽
觀以追薦高宗大帝也竟傳位於中宗孝和皇帝景龍元
年勅天下州郡並令置景龍觀二年改爲中興觀三年改
爲龍興觀其度人一依前代故事睿宗捨東京宅爲景雲

觀又捨太原宅爲唐隆觀爲資薦天皇天后也明皇開元
中勅諸道並令置開元觀又製混元讚帝親書勒之於石
又勅五嶽置真君廟又勅上都置太清宮東都置太微宮
以太原神堯舊宅爲紫微宮潞州潛龍故宅爲啟聖宮並
給袞冕絳紗帷帳交龍門戟一如宮闕之制帝又注道德
經及製序引詔天下士庶並令家藏一本兩街道衆乃以
幢幡伎樂自禁中迎歸於太清宮香花之盛近古未有又
勅置道舉一如禮部之制帝親自策之達者甚衆後蒲州
奏因修紫極宮掘地獲玉石狀如半月復有仙人杵藥之

像扣之有聲頗甚清遠帝令懸於太原元元廟庭號之爲
偃月磬東都畱守張琦奏汝州魯山縣因修仙居古觀獲
玉瑛扣之聲聞數里帝令懸於太清宮聖祖廟庭衢州爲
建觀宇穿地得魚一頭長三尺其狀似鐵微微帶紫碧之
色又如青石光瑩雕鐫殆非人功所成也扣之甚響其魚
亦不得名遣使來獻帝令宣示百僚亦不能辨帝乃呼爲
瑞魚磬仍命懸於太微宮非講經設齋不得擊之由是諸
觀競以木石模之以代集眾又詔諸官悉以宰臣及本道
節度使領之永爲常式帝又製霓裳羽衣曲紫微八卦舞

以薦獻於太清宮貴有異於九廟也帝東封獲江淮間三脊茅乃令於所獲之地置靈茅觀及禮畢迴謁聖祖於亳州本宮親札道德經於石作大幢造八角樓覆之於虛無殿之前又幸懷州開元觀及閩鄉奉仙觀爲王公萬民所請亦親札二經以大石對峙立之一如太清之製乃詔授鄔元崇爲虢州刺史開元十七年夏四月五日益州大都督府長史張敬忠奏大聖祖混元皇帝應現於當管蜀州新津縣興尼寺佛殿柱上自然隱起木文爲太上老君聖像當頂上有華蓋足下前後各有雲葉天花共一十三處

謹差判官益州功曹參軍王大鏞檢覆得狀與本州刺史李忠徇別駕盧昉縣令李韶道士僧尼一百三十人狀同方敢上奏至五月二十四日勅差內侍林昭隱宣取像柱入京於大同殿供養又令兩街宮觀各賜供養七日却令進入大內於今見在前後瑞應極多難以具錄二十九年正月七日陳王府參軍田同秀於丹鳳門外忽見紫雲自西北暎樓又見混元乘白馬侍從二童子二童子謂同秀曰我昔與尹喜將入流沙之日藏一匱靈符在桃林故關尹喜舊宅汝可請帝取之同秀具事聞奏勅差內使李志

忠監同秀往陝州桃林縣南十二里故函谷關墟求訪之
俄有紫雲白兔現於枯桑之下便乃穿掘下至水際得石
函經匱玉版朱書細篆帝聞奏大悅卽令京師列十部樂
歌舞鼓吹自通化門入其文於寶輿中五色放光洞照天
地帝於丹鳳樓上身披龍袞手執金爐六宮嬪嫔競於樓
上散花焚香遙自作禮帝又令亂撒金錢於樓下縱令士
庶分取以爲歡樂斯須山呼之聲震動京邑帝令置寶符
於靈昌殿是夜樓閣林樹之上皆有神燈乃於正月一日
改開元三十年爲天寶元年改桃林縣爲靈寶縣其後三

年帝見靈符有天寶千載之字天寶已應改元之號遂改
年爲載乃於其地長樂亭置天寶觀御製并書靈符銘立
於所獲之處又於大內置靈符殿賜同秀五品正員官宰
相請加尊號爲開元天寶神武之字制可之乃大赦天下
其年閏四月帝夢混元謂帝曰我在城之西南久矣當與
汝於興慶相見可速迎我帝謂宰相李林甫牛仙客曰朕
臨御海內向三十年未嘗不五更而起具朝服禮謁真容
爲蒼生祈福近因假寐見混元具言上事遂差內使與道
門威儀蕭元裕於城西南尋訪數日忽於樓觀山谷間見

有紫雲現白光屬天於其下穿之果得玉像老君高三尺
餘以進其日帝在興慶宮大同殿親自迎謁果符興慶之
言置於內殿供養仍令所司寫真容分送天下諸道宮觀
遂大赦天下五載帝夢見混元言我有靈應尋當自至遂
於太白山獲靈符玉冊及迎到京置於靈符殿親自供養
仍封太白山神爲靈應公改獲符洞爲嘉祥洞於山下置
真符縣乃令諸道置真符觀仍編入史其年十二月帝幸
華清宮其月四日日未出時忽見驪山頂雲物積異須臾
雲散見混元聖祖現於朝元閣上帝與內人瞻謁良久乃

隱詔改會昌縣爲昭應縣其新豐縣隸入昭應又封會昌
山爲昭應山封山神爲元德公改朝元閣爲降聖閣內出
圖本頒示天下宣付史官八載帝獲二十七仙玉像於寧
州羅川縣勅令迎像入京一如天寶初迎靈寶符儀注故
事帝親自製讚尋改羅川縣爲真寧縣於所獲處造通聖
觀帝製碑文立之於今並在其年六月大同殿產玉芝一
莖又造金仙玉芝二觀復度公主二人爲道士又太白山
人李渾上言見混元言金星洞內有玉版石記聖皇福壽
之符勅御史中丞王鉷入遊谷行四百餘里求而得之勅

以殊祥頒示中外乃於其地造靈符觀閏六月丙寅帝謁
太清宮加五聖尊號作仲尼四子像侍立於混元之前又
勅十道大郡置玉芝觀大赦天下九載太白山人王元翼
上言混元大帝降現言寶仙洞中有妙寶真符謂帝取之
勅刑部尚書張均工部尚書王伾往取獲之乃造真靈觀
十三載正月帝謁太清宮又上混元尊號爲大聖祖高上
大道金闕混元天皇帝五聖各加諡號帝加開元天地
大寶聖文神武證道孝德皇帝大赦天下十五載帝幸蜀
混元現於漢中郡三泉縣黑水之側帝親禮謁遂命刻石

像真容於所現之處又於利州益昌縣山嶺上見混元騎
白衛而過示收祿山之兆詔封其山爲白衛嶺於所見之
處置自然觀又於嵩山置興唐觀成都置福唐觀肅宗至
德二載三月十八日混元現於通化郡雲龍岩初因郡人
爲國祈福建大齋會十八日忽煙霧異香氤氲不散至辰
時漸漸開霽神光照天因見混元真像立於山前自地接
天通身白衣左手垂下右手執五明之扇儀相炳然眾盡
瞻禮其山雖高亦不及肘良久乃隱遂具上奏內出圖本
太上皇製讚并敘文繁不錄具編史冊仍示天下乾元二

年帝夜夢二青童導從至一宮闕謁見混元混元衣雲霞之衣冠九鳳之冠坐方席垂寶蓋凭玉几執白拂左右侍衛真人玉女神仙童子五天力士羅列極衆帝著絳衣秉圭立侍於混元之後遊涉山海經歷甚遠帝一一潛記又見混元鬚髮皆黑及明宣下兩街訪諸瑞像於務本坊光天觀聖祖院果獲黑髭老君之像圖寫以進帝見大悅一如夢中所睹乃出帝真容令侍立於混元之後仍頒示於天下昔令供養代宗初於楚州安宜縣獲八寶因改安宜縣爲寶應縣勅於所獲之處造寶應觀遂改元爲寶應元

年大赦天下德宗貞元十年混元潛使金母累降於果州
金泉山授鍊炁之術付女貞謝自然修習功成其年十月
十六日白日上昇後三月乃歸謂刺史李堅曰天上有玉
堂最高老君居焉壁上皆題神仙之名時注脚下云在人
間或爲帝王或爲宰輔神仙入謁老君皆四拜焉自然言
訖遂却昇天敬宗寶曆二年正月帝有事於南郊朝獻太
清宮御駕將至長安縣主簿鄭翦忽見老君衣白衣容狀
異常謂翦曰當此路有井可速實之不然禍在不測翦驚
惶顧其地已微陷遂并力實之因失老君所在駕至具以

上聞百官稱賀詔兵部侍郎韋處厚爲碑起居郎柳公權
書立於實井之側乃編付史官其年十二月十八日柳公
權書碑之際忽有勁風颯然而起旋颺不已乃見混元著
紫衣金冠金履立於白蓮花之上右手執五明扇左手垂
下空中光明如金色公權與鐫碑人瞻覩良久因以物畫
地記形像及畫畢混元忽以扇指空中流光四散乃騰空
而去衆皆側身仰視漸遠漸小沒於雲中遂以事上聞詔
編事迹入碑之中又勅於兩京造延唐觀文宗開成二年
五月中書舍人高元裕爲閬州刺史於州北八九里嘉陵

江上小山之前忽見崖壁間光彩有異近而觀之石上自然石文成老君真像眉髮衣章巾履服飾無不周備傍有一人寬衣大袖持鑪薦香後一人童子雙髻高束謹若聽命皆非人力圖繪鐫刻所及元裕每有所禱卽紫氣上浮又有靈泉自湧士民請福無不立效遂刻石建宇用旌其瑞乃畫圖呈進乞編入史詔從之武宗會昌元年勅以二月十五日大聖祖降誕之日爲降聖節仍令兩京及天下諸州府設齋行道作樂賜大酺三日軍期急速亦不在此限永爲常式懿宗咸通十年九月十日徐州逆寇龐勳領

從黨三千餘人來亳州太清宮其日宮北百姓三百餘人
見老君自宮中乘空而南須臾黑霧遍南川中羣賊迷路
自相殺戮龐勲溺水而死羣兇自此殄滅汴州節度使太
清宮使李蔚具事上聞詔曰吾國家系承混元敎導清淨
苦縣舊里聖祖故鄉宮宇具嚴廟貌斯設昨者餘妖奔突
縱火將欲焚燒陰霧覆閉於晴空狂寇顛迷於道路散逸
原野遂至誅夷緬惟元功申茲靈貺內出青詞又委李蔚
虔申告謝布示中外仍付史官十三年三月台州刺史姚
鵠奏於天台山修老君殿於其地穿獲得石函冊文以進

乞付史館頒示四方詔從之廣明二年三月河中節度使王重榮奏據晉州申龍角山慶唐觀老君殿側柏樹上瑞葛枯死重生先是武德中混元應現後於二樹間立殿宇逾年之後柏樹上忽自生葛蔓長十餘丈榮茂於常其後齊王奪嫡此蔓枯死旬月之後自其末青翠再生齊王遂敗至中宗復位安史叛逆朱泚謀亂皆忽枯落久而復生廣明元年黃巢犯闕其年秋葛蔓枯死二年冬枝葉重茂又於傍樹上別生一枝旬日之中長五十餘尺相對繁茂有異於常奏詔褒美編付史官其後祥異皆有詔勅蓋美

乎葛藟慶其神謀瓜瓞昭其遠祚混元流貺奕葉無窮者也皇帝駐驛西蜀中和二年八月九日進到帝令宣示內外三年三月十一日亳州刺史潘稠差道士馬含章孫棲梧等奏太清宮自乾寧四年已累有逆寇侵犯真源少或逾千多或逾萬皆窺伺是宮欲爲焚劫或來攻城邑或旁犯縣城老君皆密垂神化忽起濃雲或驅以陰風或擊以雷電率皆顛沛尋至敗亡靈貺益彰神功罔測尋詔昇真源縣爲畿縣仍內出青詞修崇告謝帝卽稽首東拜八月十二日勅亳州太清宮是混元降聖之里名高道祖福蔭

皇基九宮之瑞井涵空一鹿之仙蹤在樹累代之禎祥可
紀近年之感應尤彰所宜嚴盛於福庭安可荒涼於靜宇
潘稠能施善政久樂真風廣出俸錢備修宮觀垣墉棟桷
無不精新像設丹青彌加煥麗觀圖考事深可慰嘉其住
宮威儀道士吳重元可賜紫仍號凝元先生道士馬含章
孫棲梧竝賜紫潘稠加金紫光祿大夫檢校工部尚書餘
竝如故其年八月二十九日夜詔帝房宗室李特立與道
士李元爲於成都府青羊肆元中觀混元降生舊地設醮
祈真忽見虹光如彈丸許漸漸明大出於殿基東南竹林

中跳躑入西南梅樹下沒於沒處穿地三尺已來得寶壚一口長一尺一寸五分濶七寸四分一邊厚一寸三分竝有花文一邊厚一寸八分重一十二觔有古篆六字各方二寸深三分鐫刻瑩潔迨非人工文曰太上平中和災九月一日西川節度使侍中陳敬瑄奏曰皇帝陛下稽古順天膺圖撫運凝懷至道屬想大同是用省方以明罪己深仁旁達於下土至德昇聞於上元符讖允臻禎祥間出降太上匡時之命清中和寇孽之災迺示明文爰形古篆足表妖氛卽殄聖祚無疆克知收復之期便是清寧之日至

十二日帝令宣示百官中書侍郎平章事韋昭度戶部侍郎平章事蕭遘門下侍郎平章事鄭畋御史中丞張瀆宗正卿嗣曹王龜年表賀曰伏以荏蒲嘯聚車馬省方天災流行國家代有陛下降成湯罪已之詔徵王者有征之師顧彼兇妖卽當殄滅清平旣彰於嘉兆幽贊爰覩其祕文赤雀銜書貺豈同於太上元龜負卦慶難比於平災况因宗室齋醮之辰仍有祥光跳躑之瑞其爲感現可謂丁寧樞密使李順融十渾十二衛都指揮使田令孜表賀曰今者又有維城來於仙觀至誠纔發嘉兆俄呈現此時在地

之赤光是昔日度關之紫炁及穿積土果獲古文驗逸勢
於龍蛇卽知平於梟獍於冲遠理頗甚昭明旣太上令與
平災知中和永昌厥祚所現今因聖祖掘得又自皇枝捧
此靈蹤可明天意且混元聖祖每逢多難皆有殊祥唯彼
明徵備書正史昔於丹鳳門上告田同秀以天寶復國之
期今又青羊肆中示李特立以陛下還宮之慶莫不天下
幸甚乞付史館帝竝俞之十五日李特立授太子校書李
元爲賜紫仍各賜縑帛三百疋二十一日又詔曰太上元
元大帝與弟子文始先生講真經於樓觀之臺約後會於

青羊之肆便乘雲駕俱入流沙仙記傳聞地圖標載自周
昭至於此日歷數約二千餘年景像寂寥基蹤牢落今因
巡幸靈貺昭彰殊光跳躍於庭前靈篆申明於樹下博含
古色字驗休禎中和之災害欲平厚地之禎符乃現足表
元穹降祐聖祖垂祥將殲大盜之兵戈永耀中興之事業
須傳簡冊兼示寰區已付史官備令編錄仍模勒文字告
示諸道及軍前其觀可改號爲青羊宮仍置殿堂屋宇側
近屬觀田地約有兩頃近來散屬黎甿多植蔥蒜清虛之
地難使薰蒸已賜錢二百貫便令收贖仍給公驗永歸靖

廬宗子特立已除官道士李无爲已賜紫所宜昇獎用荷
慶靈敬瑄位冠公台風行郡國効節於延洪之代修心於
道德之鄉遂令境內消兵地中呈寶其爲休美倍可嘉稱
至十月七日勅高品郭遵泰監造青羊宮土木之工竝用
內庫宣賜自獲靈瑞之後至是月癸丑近蜀郡寇相次擒
戮旬月之內遂至清平駕至青羊宮頒賜有差李特立賜
緋授龍州錄事參軍又下詔曰太上垂祥青羊應現禮宜
崇飾用答殊休諸道州府紫極宮宜委長吏如法修飾仍
選有科儀道士祭醮是月乙卯奏收復京城有以見大道

垂休聖祖昭祐洪圖延永唐祚無疆者也又勅翰林學士承旨尚書兵部侍郎知制誥樂朋龜撰碑立之伏乞頒示天下以表皇家承神仙之苗裔感太上之靈貺實萬代之無窮也臣今校會從國初已來所造宮觀約一千九百餘所度道士計一萬五千餘人其親王貴主及公卿士庶或捨宅捨莊爲觀竝不在其數則帝王之盛業自古至於我朝莫得而述也中和四年十二月十五日上都太清宮文章應制宏教大師賜紫道士臣杜光庭上進謹記

欽定全唐文卷九百三十四目錄

杜光庭 六

麻姑洞記

豆圖山記

天壇王屋山聖迹記

東西女學洞記

迎定光菩薩祈雨文

隸書解

戶部張相公修遷拔明真齋詞

張氏國太夫人就宅修黃籙齋詞

奉化宗祐侍中黃籙齋詞

上官子榮黃籙齋詞

飛龍唐裔僕射受正一籙詞

皇太子青城山修齋詞

普康諸公主爲皇帝修金籙齋詞

皇太子爲皇帝修金籙齋詞

欽定全唐文卷九百三十四

杜光庭 六

麻姑洞記

繁陽山麻姑洞卽三十四化之第一陽平之別名也在繁
水之陽因以爲名本際經云天師張道陵所遊太上說經
之處在成都府新都縣南陵江十五里眾山連接孤峯特
起是也神武皇帝潛龍之時光化二年己未五月四日丙
申山土摧落洞門自開縣吏時康鄉所由楊靖道士張守
真等以事申府云自洞門開後每日有百姓往來者府差

縣典楊澤畫工任從同往檢覆畫圖申上稱把燈燭入洞看檢其第一門對北高二尺濶三尺五寸入至第二門約五尺以來第二洞門方一尺六寸入內竝是黑處長一丈二尺濶六尺有石窟兩處在東畔竝西南有洞門兩路南畔一路圓濶一尺六寸入內長一丈二尺濶一丈高四尺南畔有窟三處西畔兩路入內通繞門圓濶一丈七尺內各濶五尺高六尺以來門相去一丈門屋一所高五尺濶四尺從內往來有刻料拱甌瓦約山作石日月兼作日字月字隔子房一所濶二尺五寸高一尺五寸刻料拱甌瓦

石竈一所高一尺濶一尺五寸門濶五寸石竈三處各濶七尺又西入洞門圓濶一尺七寸彎曲入向南門屋一所高六尺濶四尺從內往來有石料拱甌瓦又有竈模兩所共一牀高一尺濶二尺三寸門濶八尺有石料拱西北角又有一門方一尺六寸四方二丈以來南畔西畔北畔各窟一所南角又有一洞圓濶一尺六寸以來將燈燭近前有黑氣出燈火卽滅更入不得其洞連接繁陽本山相去三里以來其山據諸鄉張生張贇等狀稱繁陽是古跡山每准勅祭祀其洞亦是元有往往閉塞元和中南康王韋

皋莅蜀洞忽開時人咸云洞門開卽年豐物賤尋又閉塞
至是復開其後果豐稔其洞本名麻姑洞側有麻姑宅基
蓋修道之所也

豆圖山記

縣州昌明縣豆圖山真人豆子明修道之所也西接長岡
猶通車馬東臨峭壁陡絕一隅自西壁至東峯石笋如圖
兩崖中斷相去百餘丈躋攀險絕人所不到其頂有天尊
古宮不知所製年月古仙曾作繩橋以通登覽而經筭朽
絕已久里有言曰欲知修續者脚下自生毛相傳如此

咸通中山下有毛意歡者幼而爲道常持誦五千言著敝布褐於市乞酒醉而登山攀緣峭險以絕道爲橋山頂多白松樹繫之繩橫亘中頂布板緣繩上善男女隨而度焉數年繩朽橋壞無復緝者咸通歲令與賓客醺山於西峯時展禮毛師他遊人謂令曰此峯之側有小徑抱崖纔通人跡無所攀援意歡常遊此而去逾旬不出令疑其隱在穴中座內有廣陵郭頭陀者令請由此徑往探求之頭陀驚貽不能語久之而後言曰此徑去約三十餘丈然到一穴口纔三五尺下去平地猶數百尺穴內可坐十餘人中

有巨木櫃緘鎖極固意歡讀經處石面平滑有足膝之痕而經卷在焉不知意歡之所其家有一妻一女而已疑其得道者也意歡每多持燈椀度繩橋山側居人視之以爲常矣山多毒蛇猛虎里中人莫敢獨往意歡夜歸亦無所畏焉常有二鴉客將至必飛鳴意歡整飾賓階坐榻未畢客果至矣

天壇王屋山聖迹記

蓋聞天元設象運日月以璇衡地道網維布山河而列政有王屋山者在洛陽京北百餘里黃河之北勢雄氣壯岡

阜相連高聳太虛倚懸列宿西接於崑邱東連於滄海謹
按龜山白玉上經曰洞天周迴萬里山水之源圖經曰上
則接於崑邱下卽侵於蓬島最高者首名天壇山也黃帝
內傳云爲之瓊林臺眞誥云瓊林者卽清虛小有之別天
也其下卽生泡濟之水中有水芝人得服者長生耳昔黃
帝上臺見一級高可及二丈許下石二級高可七十尺許
四方壁立皆造化融成黃帝於此告天遂感九天元女西
王母降授九鼎神丹經陰符策遂迺克伏蚩尤之黨自此
天壇之始也其上多石可生草木實爲五嶽四瀆十大洞

天三十六小洞天神仙朝會之所每至三月十八日及諸元會日五更之初天氣清明輒聞仙鐘從遠洞中發寥寥之聲清宛可入耳將日出則日氣炯炯可以見生死之情狀觀天地之變化當曉時分別之際則聞仙雞報曉往往飛棲下地象小於家雞其毛如雪又壇心有石燈臺四門中高可丈餘製造甚奇鎮於洞天諸元會日靈山真聖皆朝會壇所考校學仙之人及世間善惡籍籙之案是日往往則陰雲蔽固竟日方散是日有道之士學修仙之人投簡奏詞醺謝其下壇隅有造石燈臺小碣記云天寶八年

新安尉公使內使宮園令符筵喜因爲國爲民醺壇置碣
陰刻廬全高常嚴固至太和五年凡字缺損壇心高突秀
出羣峯每日初出影西度掩西方山脊亦可及千餘里上
無飛鳥風若松聲太虛中孤危而四面無礙人立於上沖
和血氣狀如勇心直脰而立目視厯厯亦可自辨其形影
似憑高眺遠飛越崖谷長天未曉身若浮萍又如精氣所
乘颺不得落此果乃真仙遊行之所也心若志銷爍其
精魂耳似有怖懼凡有道之士身若輕舉天明日朗則夜
聞人語笑之聲或簫鼓奏於其上又壇西有懸泉名曰太

一泉其水味甘如醴其泉水流如線落在石罅中深可數尺千人飲之不耗經年不汲如故次西一石巖名曰黑龍洞洞上半崖高數十丈有一洞深二丈許正射西北天門名曰按雲庵舊有葛梯人蹬躡可到昔太乙元君修道於此其太一泉水伏流其下東爲濟水其泉次南有一巖曰紫金堂昔軒轅黃帝駕憩於此沿堂側其道徑甚嶮至一石門側身可上乃止壇頂其門名曰東天門門東有換衣亭壇頂上有三清殿東西有廊廡壇畔有四角亭臨崖百尺凭闌四望南視嵩峯少室大河如帶西有王附山東北

內周遊萬里昔唐建三清殿及清虛觀其洞內有因兵火
居民避亂穢氣所觸民出洞後有石落塞合洞門真誥云
其洞中日月晝夜光明輝映朗接太虛與外日月無異此
乃爲日月伏根也日曰神精月曰陰精明照在洞天之中
天亦高大星宿雲氣無草木萬類洞宮之中有金玉之殿
及多寶貝黃金瑠璃瓊壁不可名狀有五闕五山加於五
嶽上生紫林方華星髓金津碧毫朱靈夜粲細實竝壺中
洞天之所生也人得食之乃長生神仙矣洞主王君掌校
仙籍善惡之錄處事其中矣太素三元上道君遣青真左

夫人郭靈蓋右夫人楊玉華賁神策玉璽見授王君爲太
素清虛真人領清虛小有洞天王分主四司左係上公治
王屋山洞天之中給金童玉女各三百人掌上清玉章太
素寶元祕籍上品九仙靈文山海妙經盡掌之焉又總洞
中明景三天寶錄得乘龍跨虎金輦瓊輪八景飛輿出入
上清受事太素寢宴太極也小有洞天者乃十大洞天三
十六小洞天七十二福地之宗首也仙都所宗太上所保
故重其任以委羣真矣元始天王曰夫小有洞天者是十
大洞天之首三十六小洞天之總首也齊嶺東一山名曰

玉陽山山東次南有瀑水如練長百尺落半崖澗下有深潭名曰攬鐘法其山名西玉陽山靈靈都宮東北有山名東玉陽山山有洞深百尺國家時投金龍於此洞旁有一憩鶴亭高數丈上有鶴跡存焉昔因周靈王太子王子晉與師浮邱公遊天壇回憩鶴於此天壇四面附山峯巒澗嶺泉谷勝跡總目於后頌曰

王屋天壇福地元清虛小有洞天仙無窮勝境於人物有感神通今古傳

東西女學洞記

長安富平縣北定陵後通關鄉入谷二十餘里有二洞一名東女學一名西女學其東女學崖壁懸絕洞門在崖面躋攀不及夜往往聞讀書之聲其西女學約山有路可到洞門近門一石室可容一二十人其洞門時有人秉燭可入行一二十里兩面有五門皆各有題記或云通蓬萊及諸仙境近年有石摧下遮閉洞門不通人入又山頂有一天井直下深二丈許有自然橫石旁出石下天井亦可二丈餘可通人過其底傍有崖龕梯磴而上曲屈甚廣龕內有道經數萬卷皆置於柏木板牀之上有一石人俯首凭

案而坐形如生人天井之底有道門所投之簡委積朽爛
不知其數其大順年中富平奉道人姓徐第七曾於洞內
取養生經出外傳寫却送山洞中又向北行二十餘里有
三泉山谷中有石山嵌可容二三百人當谷內有三石盆
其盆各廣丈餘制度光滑殆非人功三盆湧出泉水常滿
餘水流出山外故老云時有仙人浴此盆大都此山有人
觸犯卽立致雷電傷損苗稼由是鄉里多隱蔽蹤跡難於
尋訪山上有仙人鬬聖蹤跡極多東女學山前有神鵬一
窠常護洞門人或侵犯者神鵬擊之立致隕斃古有道流

刻五石人置於山上民有鋤禾者爲鵙所驚走避於石人之下置筮於石人頭上鵙卽擊之石人頭隕於今見在其山下通關鄉多姓公孫賈家山上石保村多姓呂氏麻氏迎定光菩薩祈雨文

元旱自天豈容私禱急難告佛實出微誠恭惟定光菩薩智海難量便門廣闊不辜眾生之願肯辭千里之遙靈應慈雲旣無心而出岫滂沱法雨端有意於爲霖

隸書解

世人多以隸書始於秦時程邈者非也隸書之興興於周

代何以知之按左傳史趙筭絳縣人年曰亥有二首六身
是其物也士文伯曰然則二萬六千六百有六旬也蓋以
亥字之形似布筭之狀按古文亥作元全無其狀雖春秋
之時文字體別而言亥字有二首六身則是今之亥字下
其首之二畫豎置身傍亥作豕此則二萬六千六百之數
據此亥文則春秋之時有隸書矣又酈善長水經注云臨
淄人有發古墓者得銅棺棺外隱起爲文言齊太公六代
孫胡公之棺也惟三字古文餘同今書此胡公又在春秋
之前卽隸書興於周代明矣當時未全行猶與古文相參

自秦程邈已來乃廢古文全行隸體故程邈等擅其名非創造也

戶部張相公修遷拔明真齋詞

臣聞太上開圖元皇演教三籙定金明之典功被人天九幽懸玉匱之科惠周存沒竊尋經旨遵按元文仰祈遷拔之恩輒備懺陳之懇今月二十五日是臣先妣唐楚國夫人蜀追封宋國太夫人劉氏忌辰今月三十日是臣先考唐丞相太子太師致仕蜀追贈太尉忌辰謹賫油燭香花供養之具於成都府玉局化北帝院奉修靈寶明真道場

一晝一夜道士一十四人三時行道三時轉經對乾象以
披心馳香龍而上奏伏惟高尊憫鑒眾聖垂光普告四司
關明三界降九龍符命開長夜寒庭鍊沐彤魂遷拔神爽
出元陰之府入洞陽之宮罪咎蠲消冤讐解釋落名地簡
列籍道階輪轉福鄉克登仙品九元幽識咸遂超昇誓勤
修奉之心上答真靈之澤

張氏國太夫人就宅修黃籙齋詞

伏以妙道元功濟時佐國真經祕旨拯物救人肇宏規於
億劫之前宏大化於萬天之內宗之者儲祥納祐修之者

駕景登晨披究古今昭彰典誥張氏克承禎貺運偶聖明
被沐天光輝華帝澤循懷顧分常抱兢憂省已修躬每爲
炯戒實恐往世之積瑕未懺此生之累釁將深幽陰有注
誦之書冥漠有考延之籍又張氏今年天符臨於木墓之
位暗曜住於飛化之年火星照於身宮仍當剋之性分大
運逢王金之上火力稍微小運值生金之鄉木氣已薄緬
思厄會倍用憂虞竊惟大道無方施恩普洽式申虔祝必
介休祥是用蠲潔丹心修崇黃籙像瑤壇而肅列按瓊韞
以敷陳質信諸天燭蘭缸於午夜告明三界飄檀蕙於九

時露懇馳誠希恩悔過伏惟高尊太上萬聖千真憫鑒叩
祈昭宣渥澤勅天司地府命陰職陽察黑簿落名青宮著
錄和平債訟消解冤讐北都除執對之篇年齡增遠南極
定延長之紀祿祚九宜五行祛災滯之文九曜息照臨之
咎常歡舜日永廕堯天眷屬樂康子孫忠孝九元七祖往
逝先亡或拘滯昏衢未超福路願承道力便遂往生利佑
見存允蒙貞吉其有三塗六趣夜府寒鄉亦因懺滌之緣
盡獲逍遙之果陰陽將吏宅宇龍神長悅豫以安寧俾凶
衰而殄息上願皇圖遐廣聖壽延洪卜年克大於姬周享

祚更隆於炎漢寰瀛一統書軌混同共傾捧日之心咸沐
自天之祐

奉化宗祐侍中黃籙齋詞

伏聞道本無爲降元精而生二象象而後數羅五緯而備
羣形維地麗天無違於律厯陽舒陰慘咸繫於裁成由是
善惡循環吉凶倚伏乾剛坤載不能排九六之期蟾魄烏
輪不能革盈虧之勢況乎二儀稟質三命定生未超變化
之機固有推遷之理是宜兢懷省己審過知非常加策勵
之心冀動真靈之鑒臣夙承元蔭早沐洪休運偶睿明身

叨寵任推忠陳力未申匡濟之勞翊聖扶天累荷超逾之
渥將壇相印委遇益隆蒼佩行師徽榮彌厚戒滿盈而徒
切報君父以何階尚恐動靜行藏有乖於素分屬心舉念
有忤於神明或在公有失於賞刑統眾有愆於裁斷或往
世之尤違未解或積生之冤債未祛有一於斯皆宜懺滌
又今年二運俱逢於墓位飛天仍直於火星雖居華蓋祿
德之方恐有刑剋照臨之數以茲兢懼倍切懇誠徐氏年
運之中亦有災滯大小二運金火氣微飛宮遇於計都天
符臨於生月恐爲災滯志在懺祈是敢恭備信儀虔申齋

金剛經卷第二
二
潔按元都品格修黃籙道場嚴香花於二日六時召真聖
於諸天諸地凝神注念慇懃披心伏惟萬聖迴光眾真流
鑒憫其丹款錫以休祥赦已往之罪瑕息將來之厄滯明
星暗曜無臨照之凶三命五行除衝妨之會冤仇和釋債
訟消平嗣允繁昌壽祿延益九元蒙福幽夜開光眷屬康
寧龍神安豫上願聖躬萬壽大業永昌布聲教於九圍咸
歡舜澤混車書於八極共樂堯仁百穀豐盈六氣均暢誓
傾忠孝上酬英睿之慈克勵精誠仰副真靈之祐

上官子榮黃籙齋詞

伏以大道元功至真妙感隨方流貺應念垂慈佐國濟人
恩周於動植祛災降福惠及於幽明凡所啟祈必蒙昭鑒
某氏以今年大小行運之內恐三命衰微陰陽宿曜之中
恐五星臨照致成災厄無所告祈竊聞黃籙妙齋功德廣
大無災不解無厄不穰輒罄丹誠冀蒙元祐謹依科法開
置壇場三日香燈九時懺謝至真冥應有感必通伏願三
境諸天高真眾聖降無涯之澤垂廣覆之恩爲某氏解除
積世罪瑕多生冤債隨懺消平應時除蕩眷屬安貞公私
和泰誓傾忠孝永奉聖朝

飛龍唐裔僕射受正一錄詞

伏聞冥寂之初混元之首道生一氣分彼兩儀陰陽有昇
降之殊清濁有仙凡之異是則紫清金闕高居太妙之庭
黃軸風關下鎮窮泉之域隨機染惑因生進退之疑委跡
沈浮遂有飄零之痛旣非先覺必在指迷元元大帝當東
漢之季年啟南宮之寶笈首傳真籙大拯羣生修之則駕
景沖虛行之則濟人佐國或蕩平氛沴或懲革凶妖正日
月之天綱風雲叶候靜災邪於地紀生植無愆歷代所尊
垂休靡極臣夙承道廕獲奉皇慈功輕而渥澤愈隆力薄

而君親未報常思稟窺祕籙宗受靈文勤旦夕之香燈勵
精虔而禱祝所冀家國同納禎祥今則嚴備信儀恭開壇
墀通宵懺滌稽首歸依蘭燈夜燭於九冥檀炷晨飛於三
境恭馳懇款冀達尊靈伏惟太上三尊元元大帝十方眾
聖三洞威神鑒丹懇之誠賜通感之應靈官真氣咸賜授
傳使內保身安外祛災沴名臻道籍罪滅陰曹九元離積
夜之香永棲長樂舉族享無涯之善常奉休明算壽遐延
公私清泰上願龍圖悠久鳳歷延洪增聖壽於無疆乾坤
共永布皇恩於有截海岳咸安同爲至道之風共暢無爲

之化

皇太子青城山修齋詞

臣聞靈寶陳規齋戒感希夷之兆真文設教行藏通修鍊之功莫不啟之於心宏之於道上可以虔祈穹昊昭達元微次可以宣布精誠祇延福祐永言奉信敢薦虔恭伏以皇帝劃地開基法天垂覆定禍亂而爰承土德闡真明而克應金行翼翼小心宏朽索薄冰之懼朝乾夕惕有櫛風沐雨之勞備厯歲時益勤祇敬是致年豐歲稔國富兵強定蜀漢之疆圻扼黔巫之襟帶允文允武咸序彝倫至公

至平式崇治本四方慕義萬里歸仁梯航無隔於高深書
軌盡同於風教蓋九霄之靈蔭信大道之冥扶用啟帝國
聿昌宸算永言戴仰彌切兢持近者以星象畱行稍掩時
景分野觀矚實資禱祈是用潔志清心忘機滌慮召十洲
之法侶約三洞之元科敬設清齋仍啟大醮伏願上眞降
鑒眾聖宣慈迴機軸於元關啟輝光於丹道凡言災沴竝
獲消除但有吉祥皆承應感增聖壽於千秋之外播皇猷
於萬宇之中壽山采峻於五山福海更深於八海與乾坤
而齊固共日月而合明叶華戎推奉之情遂臣子依憑之

懇盡繫至教俯契微衷冒瀆真仙無任兢惶戒懼激切屏營之至謹遣得一大師賜紫張茂卿等一十四人虔修法事願鑒丹誠

普康諸公主爲皇帝修金籙齋詞

伏聞道運虛無泮元黃爲九元之始象疑恍惚標化育爲獨化之源於是覆載以乾坤照臨以日月三才共道剛柔之用迭興品彙攸生善惡之端遂列然後降之以君父佐之以股肱法高皇不宰之慈體大帝無言之煦宏安疆域大庇黎甿伏惟皇帝陛下出震臨人承乾御歷稟樞機之

精耀含嶽瀆之靈源明契三辰運符四序當天人之允屬
表讖瑞之咸臻因念陵夷遂康烝庶鎮寧郡國割裂江山
辛勤侔大禹之功化洽媿成周之德豈忘宵旰莫憚焦勞
是用和平永期清泰某等今以時當端月節遇正陽屬二
氣之將交處午位之炎景思宏百福用薦千齡啟金籙之
靈壇造玉京之勝地伏願皇帝明齊月桂壽比天榆握金
鏡以御寰瀛致衢樽而歡億兆垂旒問道覩元凱之忠貞
負辰調元獲夔龍而翊贊四三皇而共固一六合以無虞
仰奉虛皇俯垂元造冀納虔祈之志共申懇禱之誠

皇太子爲皇帝修金籙齋詞

伏以浩邈無涯育乾坤者至道彌綸莫極運造化者元功
凝一氣以生三才周六虛而吹萬有所以春皇秋帝雲紀
火官承妙用以御寰瀛體無爲而統天地曷嘗不舍和韞
粹端拱穆清執大象以臨人乘飛龍而布化雖流金爍石
湯德彌光懷山襄陵堯風益扇皇帝應圖負扆握鏡開基
慕元元慈儉之宗仰黃帝華胥之躅日愼一日雖休勿休
故得聲教旁敷京坻積稔俗臻暇豫民樂雍熙交歡自洽
於鄰封縣贖爭來於絕域倍增寅畏祇荷穹旻昨以垂象

飛芒天文炯戒躔次雖殊於分野禱祈勵切於焚修恭啟
皇壇敢希鴻福仰玉清之元化稽首知歸開金籙之道場
齋心發願所貴者達誠碧落薦壽皇躬與日與月之同明
共天共地之咸久青詞奏御俾金慧以韜光丹表通真致
珠囊之叶度災躔永息禎瑞常臻鳳歷克調狼烟不警政
隆三五祚越億千位忝儲宮實欽仙境輒傾素懇仰望元
慈